



ԱՄԵՆԱՅՆ ՀԱՅՈՑ ՎԵՀԱՓԱՌ ԿԱԹՈՂԻԿՈՍԻ ՇՆՈՐՀԱՎՈՐԱԿԱՆ ՀԵՌԱԳԻՐԸ ՀԱՅԱՍՏԱՆԻ 25-ԱՄՅԱ ՀՈՒԵԼՅԱՆԻ ԱՌԹԻՎ

ՀԿ(Բ)Պ ԿԵՆՏԿՈՍԻ ՔԱՐՏՈՒՂԱՐ ԳՐԻԳՈՐ ՀԱՐՈՒԹՅՈՒՆՅԱՆԻՆ
ՀՍՍՌ ԳԵՐԱԳՈՒՅՆ ՍՈՎԵՏԻ ՆԱԽԱԳԱՀՈՒԹՅԱՆ ՆԱԽԱԳԱՀ
ՄԱՅԱԿ ՊԱՊՅԱՆԻՆ
ՀՍՍՌ ԺՈՂԿՈՄՍՈՎԵՏԻ ՆԱԽԱԳԱՀ ԱՂԱՍԻ ՍԱՐԳՍՅԱՆԻՆ

Սրտագին ողջունում ենք Հայաստանում Սովետական իշխանության հաստատման քսանհինգերորդ տարեդարձը: Քսանհինգ տարիների համառ և արդյունավետ աշխատանքով Սովետական Հայաստանի կառավարությունը ոչ միայն վերացրեց հայ ժողովրդի սրտին նստած վշտերն ու դառնությունները, այլև Հայաստանը դարձրեց լուսավոր, քաղաքակրթված, ծաղկուն մի երկիր: Այդ են վկայում մեր բազմաթիվ գիտական հաստատությունները, ժողովրդական համատարած կրթությունը, արվեստների և գրականության աննախընթաց վերելքն ու ծաղկումը: Այդ են վկայում մեր ծաղկած արդյունաբերությունն ու գյուղատնտեսությունը և մեր համատարած շինարարությունը: Հավատացած ենք, որ հետայսու Հայաստանը սովետական իմաստուն կառավարության ղեկավարությամբ նորանոր հաղթանակներ կտանի հայ ժողովրդի զարգացման և առաջադիմության գործում: Խորագույն կերպով հավատացած ենք նաև, որ ՍՍՌ Միության կառավարության և մեծ Ստալինի ջանքերով հայ ժողովուրդը իրա-

կանացած կտեսնի իր հայրենիքի ամբողջացումը և իր ժողովրդի համախմբումը Մայր Հայրենիքում: Սովետական Հայաստանում:

Այսօր, Սովետական Հայաստանի քսանհինգամյա փառապանծ տարեդարձի օրը, Հայ եկեղեցին, հոգևորականությունը և հավատացյալ ժողովուրդը ամենուրեք, ինչպես Մայր Հայրենիքում, Սովետական Միությունում, նույնպես և արտասահմանյան բոլոր եկեղեցիներում մատուցում է սուրբ պատարագ, կատարում հանրապետական մաղթանք և խնդրում Բարձրյալին իր ամենակարող Աջով հովանի և զորավիգ լինել հայ ժողովրդին և նրա հարազատ Սովետական կառավարությանը:

Հայ եկեղեցին իր ավանդական տրադիցիաներում պաշտպանել է և այսօր առավել ևս պաշտպանում է Հայ Հայրենիքի և Հայ պետականության միասնական և սուրբ գաղափարը:

Թող Ամենաբարձրյալի օրհնությունը լինի Ձեր և Ձեր ձեռնարկած գործերի վրա:

ԳԵՎՈՐԳ Զ.

Կաթողիկոս Ամենայն Հայոց

